

# Te Reo Māori

## Taumata 6 Te Marautanga o Aotearoa

### Taumata 1 NCEA Te Reo Rangatira

#### NGĀ KŌRERO WHĀNUI

##### He aha tēnei mea te reo Māori?

E ai ki te kōrero a Tā Hēmi Henare (1984), *Ko te reo Māori te kākahu o te whakaaro, te huarahi i te ao tūroa.*<sup>1</sup> Nō reira, mā te reo Māori ngā whakaaro e whakapuakina ai, mā te reo Māori ngā āhuatanga katoa o te ao Māori e kitea ai, ā, mā te reo Māori e mārama ai te ao o ngā ākonga kōrero Māori.

Mō ngā ākonga Māori, ko te reo Māori tētahi huarahi e tū pakari ai rātou i runga i tō rātou mana motuhake.

*Ko tā te reo Māori he aro ki te mana motuhake o te tamaiti me ōna takenga katoa – takenga reo, takenga tikanga, takenga wairua. Ko te reo te whakapuakitanga o te whakaaro. Ka noho tahi te whakaaro me te reo.*<sup>1</sup>

Ki te whānui ake te titiro, ko te tino nuinga o ngā tāngata i te ao nei he kōrero reo rua, reo toru, reo maha rānei. Ko ngā pūkenga me ngā mātauranga ka ākona i te reo Māori, he mea whakawhiti ki reo kē, ki ahurea kē. Nō reira, ka puta te ākonga kōrero Māori ki roto i te ao whānui, hei tangata pūkenga maha, hei tangata mō tēnei rau tau.

##### Te wāhi nui ki Te Reo Māori i te kura

Ko te reo Māori te tūāpapa mō ngā akoranga katoa i roto i ngā akomanga rumaki reo Māori me ngā akomanga reorua. Ka noho ngā pūkenga reo, te mātauranga reo me ngā rautaki reo hei anga mō te ako i ngā wāhanga ako katoa.

*E eke ai te ākonga ki ngā taumata o te mātauranga i ērā atu wāhanga ako, me eke ki te ikeiketanga o te reo.*<sup>2</sup>

E rere ana te reo Māori i roto i ngā wāhanga ako katoa, hei reo whakawhiti whakaaro, hei reo whakapakari pūkenga, hei reo whakawhānui mātauranga. Mā reira e māmā ake ai te ako i ngā mātauranga o ērā atu wāhanga ako o te marautanga, me eke te ākonga ki ngā taumata o te reo Māori. Mā reira e ū ai te ako.

---

<sup>1</sup> Ministry of Education. (2008). *Te Marautanga o Aotearoa*. Wellington: Learning Media Limited. (p24)

<sup>2</sup> Ministry of Education. (2008). *Te Marautanga o Aotearoa*. Wellington: Learning Media Limited. (p24)

## Ngā whāinga whānui o Te Reo Rangatira

Mō ngā ākonga i roto i ngā akomanga rumaki, reorua rānei, ko Te Reo Rangatira te huarahi aromatawai i te reo Māori i ngā taumata 6 ki te 8 o Te Marautanga o Aotearoa. E toru ngā whāinga whānui o Te Reo Rangatira.

### **Ko te reo Māori te kākahu o te whakaaro**

He rerekē te momo reo e hiahiatia ana hei kake ki ngā taumata o te mātauranga, i te reo e whakamahia ana i ngā kōrero o ia rā. Ka whai haere te ākonga kōrero Māori i te huarahi o te mātauranga, ka rerekē haere anō hoki te reo Māori e tika ana kia mōhio ia, hei nanao i ngā akoranga hou. Ko tētahi o ngā whāinga whānui o Te Reo Rangatira, ko te ako i te reo hei:

- reo kōrerorero
- reo whakapuaki whakaaro
- reo ako

### **Ko te reo Māori te huarahi i te ao tūroa**

E whai ana tātou kia eke ngā ākonga kōrero Māori ki ngā taumata o te reo, ki ngā taumata anō o te mātauranga. E ū ai ērā whāinga, me tū rangatira ngā ākonga i roto i tō rātou ao, arā, i roto i te ao Māori, i roto anō i te ao e noho nei rātou. Engari me Māori tā rātou titiro ki te ao, kia tū ai rātou hei Māori i roto i te ao. Nā, ko te reo Māori te reo e mārama ai te tirohanga Māori, ā, mā te reo Māori anō te tirohanga Māori e whakapuaki.

### **Kia rere te reo, kia Māori te reo, kia tika te reo**

Kei pōhēhē tātou ko te ako kupu me te ako i ngā ture o te reo anake te huarahi e mōhio ai tātou ki te reo Māori. Ko aua āhuatanga o te puna reo, tētahi wāhanga anake o te ako i te reo.

Kia rangatira ai te reo, kia rangatira anō ai te ako, me matatau te ākonga ki ngā āhuatanga katoa e rere ai, e Māori ai, e tika ai te reo.

I roto i te marautanga ka kitea ngā āhuatanga e ono o te reo arā, ko te reo ā-waha, te reo ā-tā, te reo ā-tinana me ngā huarahi e whaihua ai te whakamahi i te reo arā, ko ngā āheinga reo, te puna reo me ngā rautaki reo.


## **TE MARAUTANGA TE REO MĀORI**

E tautoko ana ngā paerewa paetae Te Reo Rangatira i te wāhanga ako e kīia nei ko Te Reo Māori i roto i te Marautanga o Aotearoa. E taki ana Te Marautanga o Aotearoa i te ahunga mō te whakaako me te ako i roto i ngā akomanga rumaki, akomanga reorua, ā, e ārahi ana te wāhanga ako Te Reo Māori i ngā hōtaka whakaako i te reo Māori. Nō reira, e tika ana kia noho te wāhanga Te Reo Māori hei ārahi i te taha aromatawai. Kua ahu mai ngā paerewa paetae Te Reo Rangatira i ngā huatau kua whakaaturia i ngā taumata 6 ki te 8 o te wāhanga ako Te Reo Māori o Te Marautanga o Aotearoa.

I roto i ngā whenu e toru e kitea ai ngā huatau matua o te wāhanga ako. Nā, ko te reo ā-Waha, ko te reo ā-Tā, me te reo ā-Tinana ērā. He momo horopaki ēnei, ā, ka tipu ngā pūkenga reo, pēnei i te whakarongo me te kōrero, te pānui me te tuhituhi, te whakaatu me te mātakitaki, i roto i ēnei whenu e toru.

Kua āta whakatakotohia ngā whāinga paetae o te wāhanga ako Te Reo Māori kia toru anō ngā aronga, arā, ko ngā Āheinga reo, ko te Puna reo, me ngā Rautaki reo. Ka whakatewhatewha ngā ākonga i ngā whāinga paetae i roto i ngā horopaki o te reo ā-Waha, te reo ā-Tā, me te reo ā-Tinana.

Ehara i te mea ka noho wehe tētahi wāhanga i tētahi, tētahi whenu i tētahi, tētahi huatau i tētahi atu. Ehara i te mea ka noho wehe te kōrero i te whakarongo, te pānui i te tuhituhi, te whakaatu i te mātakitaki. I te wā e pakari haere ana tētahi pūkenga, ka pakari anō ētahi atu āhuetanga o te reo. Koinei tētahi o ngā rerekētanga o tēnei wāhanga ako Te Reo Māori i te wāhanga ako Reo Māori o mua. Ko tā te wāhanga ako o nāianei titiro ki te reo Māori, e hono ana ngā wāhanga katoa o te reo.



## TE WHAKAAKO I TE TE REO MĀORI

E rua ngā tino whāinga o te whakaako i Te Reo Māori i roto i ngā kura me ngā akomanga ko te reo Māori te reo kawē i ngā mahi:

1. ko te oranga tonutanga o te reo Māori
2. ko te ekena o ngā ākonga ki ngā taumata o te mātauranga.

Ko te huarahi matua e puāwai ai ēnei wawata, ko te ekena o ngā ākonga ki ngā taumata o te reo. Ka pēhea rā? Mā te tika o te whakaako, mā te tika anō o te ako.

Ko ngā mātāpono o Te Marautanga o Aotearoa e ārahi ana i te whakaako i te reo Māori:

### **Ko te ākongā te pūtake o te ako**

Kia hāngai ngā akoranga reo Māori ki te ao o te ākongā. Waiho te ao o te akonga hei horopaki ako—ko ōna hiahia ako, ngā kaupapa e kaingākau ana ia, me ngā horopaki o tōna ao hei aronga mō ngā akoranga. Mā reira e tuturu ai ngā akoranga. Koinei tētahi o ngā huatau matua o whakaako reo, arā, me tuturu ngā horopaki ako me ngā horopaki whakawhiti kōrero.

*Using authentic texts and contexts for learning te reo Māori supports the development of communicative competence and engages learners in a way that supports student achievement.*

### **Kia pūmau te ākongā ki a ia anō**

I roto i ngā akoranga reo Māori, me torotoro ngā ākongā i te ao Māori o ēnei rā, me te ao Māori o mua:

- Whakamahia nga tuhinga reo Māori o mua, o nāiane hoki.
- Me tātari, me whakatairite ngā ākongā i ngā momo reo Māori o mua, o nāiane hoki.
- Kia aromātai ngā ākongā i ngā rautaki reo e whaihua ai te whakawhiti kōrero i roto i ngā horopaki Māori.

*Māori learners experience education success as Māori.*

Mā ēnei momo mahi ako e mōhio ai te ākongā ki tā te Māori titiro ki te ao, ā, ka pūmau te ākongā ki a ia anō.

### **Kia eke te ākongā ki tōna taumata**

I roto i ngā akoranga reo Māori, me whai wāhi te ākongā ki te whakatutuki putanga ako e rite ana ki ōna āheinga. Ko tētahi o ngā huarahi e tutuki ai tēnei mātāpono, ko te hoki atu, hoki atu ki ngā akoranga matua i roto i ngā whāinga paetae, engari me rerekē pea ngā horopaki. Mā konei e ū ai te ako, e mārāma pū ai te ākongā ki ngā huatau matua.

*Give lots of practice in new learning.*

Heoi, mō te taha aromatawai, kia kua e waiho mā te mahi aromatawai kotahi anake te kaha o te haere whakamua o te ākongā e whakaatu atu. Engari, kia maha ngā huarahi e wātea ana ki te ākongā hei whakaatu i tāna e mōhio ana, e whakapono ana, e mārāma ana.

*Provide ongoing opportunities for learners to demonstrate what they know, believe, understand and can do.*

Me mōhio anō te kaiako ki te whakaatu, ki te whakamārama i te haere whakamua o te ākongā. Me āta whakamārama i ōna pūkenga reo, i ōna āheinga reo, me ōna rautaki reo. He huarahi whakaako anō tēnei. Ki te whakamārama te kaiako i

*Describing progress is as important as*

ngā āhuatanga ake o te reo o te ākongā, mā reira e ako ai te ākongā i ngā huatau matua o te ako reo me te reo whakamārama i te ako. He pūkenga ako nui tēnei.

*measuring  
achievement.*

Nā, ko te aromatawai i te reo he wāhanga nō te ako i te reo. Nō reira, kia ōrite te āhua o ngā mahi aromatawai i te reo Māori ki ngā mahi ako i te reo Māori. Ko te rerekētanga o te aromatawai, ko tā te kaiako titiro ki te mahi a te ākongā. Ehara i te mea, ko te mahi te mea rerekē.

*Aromatawai is a part of  
ako.*

### **Me mahi tahi te kura, te whānau, te hapū, te iwi, me te hapori**

He wāhi nui tō te whānau, tō te hapū, tō te iwi, i roto i te hōtaka whakaako reo Māori. Me whai te hōtaka whakaako reo Māori kia ora ai ngā reo ā-iwi o ngā ākongā. Nō reira, whakawāteahia te huarahi kia uru mai te reo ā-iwi ki roto i ngā akoranga reo Māori. Whakatenatenahia ngā ākongā kia kōrero i ō rātou ake reo ā-iwi, kia hāpai anō i te reo ā-iwi o te haukāinga.

*Te Reo Māori lives in  
the community, not  
just in the classroom.*

Kei roto i ngā rauemi reo Māori (ā-pukapuka nei, ā-kiriata nei, ā-tangata nei) ngā tauira o tēnā reo ā-iwi, o tēnā reo ā-iwi. Tukuna ngā ākongā kia tātari i te reo o tēnā, o tēnā iwi, me te reo o te tangata e rangona ai tōna ake wairua.

Mā te mahi tahi ki te whānau e mōhio ai te ākongā, he reo ora te reo Māori, ā, e ora ana te reo i roto i te ao, kaua i roto anake i te akomanga.

## **Ko te oranga taiao, he oranga tangata**

I roto i ngā akoranga reo Māori, me whai kia eke ngā ākonga ki ngā taumata o te reo, ki ngā taumata anō o te mātauranga. Ahakoa te kaupapa e ako nei te ākonga, me ako anō ia i te reo hei tūāpapa mō tana ako i kaupapa kē atu. Ki te kore ōna reo Māori, kua kore ia e whakapuaki whakaaro, kua kore ia e ako, ahakoa te kaupapa. Nō reira, me mōhio te kaiako ki ngā momo pūkenga reo me ngā momo reo e hiahiatia ana i ērā atu wāhanga ako o te marautanga.

*Te Reo Māori underpins all learning across the curriculum.*

Ka taea te whakawhiti ngā pūkenga me ngā mātauranga reo ka ākona i roto i ngā akoranga reo Māori ki ngā akoranga o kaupapa kē atu. Engari me āta whakaako i te ākonga ki ngā rautaki whakawhiti pūkenga reo, mātauranga reo, rautaki reo.

*Learners need explicit teaching of how to transfer what they learn in te reo Māori to other learning areas.*

## **Te Aromatawai**

*E renarena anō ai te whītau whakahere i te tangata ki te ao Māori, ki te wairua Māori, ki ngā tikanga Māori anō hoki me whakapakari, me whakawhanake tonu i ngā pūmanawa, me ngā pūkenga e kīia ai tātou, he Māori tātou. Ko tētehi kaupapa i whakawhānuitia ko ngā tairongo nā Rongo hai aromatawai. He Māori te wairua, he Māori te whakaaro, he Māori hoki te whakatinanatanga.<sup>3</sup>*

Ko tēnei mea te aromatawai i te reo Māori, he whānui ake i ngā whakamātautau ā-motu. He wāhanga te aromatawai nō te ako, i te mea, mā te aromatawai e mōhio ai te kaiako ka pēhea te whanake haere o te ākonga i roto i ana mahi ako. Ā, e ai ki te kōrero o runga nei, ka ahu mai ēnā mōhioatanga i ngā tairongo katoa. Ko te aronga matua o te aromatawai, ko te ārahi i te ako o te ākonga, kia kaha ake ai te ako, kia whaihua ake ai te whakaako.

## **He mātāpono mō te aromatawai i Te Reo Māori**

E waru ngā mātāpono e ārahi ana i te aromatawai i te reo o te ākonga. I ahu mai ēnei mātāpono i Te Ohu Matua (Aromatawai) i te tau 2007:

- Illuminate Māori achievement
- Align with kaupapa Māori philosophy
- Be sensitive and responsive to linguistic issues eg reo ā-iwi, codeswitching etc
- Fulfil Māori aspirations for language regeneration and cultural transmission
- Enabling for teachers and schools to meet national and local curriculum requirements
- Value and validate mātauranga Māori
- Align assessment practices across the sectors of Māori-medium education
- Should enhance student motivation and engagement.

Arā ētahi āhuatanga ake o te aromatawai i te reo Māori:

---

<sup>3</sup> *Rukuhia, Rarangahia Ministry of Education Position Paper Aromatawai Draft November 2012. Unpublished paper. p3.*

1. He ruarua noa iho ngā tauira aromatawai i te reo Māori.
2. He rerekē katoa ngā āhuatanga reo o tēnā ākonga, o tēnā ākonga.

Nō reira, me whānui ō tātou whakaaro mō tēnei mea te aromatawai i te reo. He wāhi tō te ākonga i roto i ngā mahi aromatawai, he wāhi anō tō te kaiako me te kura, he wāhi anō tō te whānau i roto i ngā mahi aromatawai i te reo Māori. Nō reira, me mahitahi te kura, te whānau, te ākonga ki te kimi huarahi e kitea ai te haere whakamua a te ākonga i runga i te ara ako i te reo Māori.

## NGĀ PAEREWĀ PAETAE

### Te kōpū paerewa paetae o Te Reo Rangatira (Taumata 1)

Ā-Waha/Ā-Tinana	Ā-Tā	Rautaki Reo
1.1 Te whakapuaki whakaaro hei kōrero whakamōhio 3 whiwhinga <b>Ā-rotō</b>	1.3 Te whakapuaki whakaaro hei tuhinga whakamōhio 3 whiwhinga <b>Ā-waho</b>	1.10 Te whakamahi rautaki rangahau. 3 whiwhinga <b>Ā-rotō</b>
1.2 Te whakapuaki whakaaro hei kōrero auaha 3 whiwhinga <b>Ā-rotō</b>	1.4 Te whakapuaki whakaaro hei tuhinga auaha 3 whiwhinga <b>Ā-rotō</b>	1.11 Te whakaatu i ngā putanga rangahau 4 whiwhinga <b>Ā-rotō</b>
1.5 Te whakatau kaupapa hei kōrero 3 whiwhinga <b>Ā-rotō</b>	1.6 Te whakatau kaupapa hei tuhinga 3 whiwhinga <b>Ā-waho</b>	
1.7 Te tātari i te reo kōrero 3 whiwhinga <b>Ā-rotō</b>	1.8 Te tātari i te reo tuhituhi hou 3 whiwhinga <b>Ā-waho</b>	
	1.9 Te tātari i te reo tuhituhi tawhito 4 whiwhinga <b>Ā-rotō</b>	
	1.12 Te urupare atu ki ngā tuhinga reo Māori 3 whiwhinga <b>Ā-rotō</b>	

## Te hononga ki te marautanga (whāinga paetae, Taumata 6)

Ko te wāhanga ako Te Reo Māori i roto i *Te Marautanga o Aotearoa* (2008) te tūāpapa mō ngā paerewa paetae Te Reo Rangatira (Taumata 1). I ahu mai ngā paerewa paetae katoa o te Taumata 1 i te Taumata 6 o *Te Marautanga o Aotearoa*. Mēnā ka ārahina te hōtaka whakaako reo Māori e ngā whāinga paetae o te wāhanga ako Te Reo Māori i te Taumata 6, ka hāngai te hōtaka whakaako ki ngā paerewa paetae Te Reo Rangatira (Taumata 1).

E toru ngā whenu o te wāhanga ako Te Reo Māori arā, ko te ā-Waha, ko te ā-Tā me te ā-Tinana. E toru anō ngā whāinga paetae matua, arā, ko ngā Āheinga Reo, te Puna Reo, me ngā Rautaki Reo. Ka kitea ngā whenu me ngā whāinga paetae i roto i ngā paerewa paetae.

Kua āta whakatakotohia anō ētahi paerewa paetae mō ngā rautaki rangahau. I pēnei ai nā te nui o te wāhi ki ngā mahi rangahau me ōna pūkenga katoa i roto i ngā kaupapa ako katoa o te marautanga.

Tirohia a *Hei Korowai Tuatahi mō te Marautanga Reo Māori: Te whakamahi i te marau reo Māori*. Kei reira te roanga o ngā kōrero mō ngā whāinga paetae me ngā putanga ako o te wāhanga ako Te Reo Māori i roto i *Te Marautanga o Aotearoa*.



Taumata 6 –

Āheinga Reo: Ka tutuki te whānuitanga o ngā āheinga reo i roto i te wairua ngahau me te hiahia ki e whakawhitiwhiti whakaaro.

	Whāinga Paetae	Putanga Ako	Paerewa Paetae
ā-Waha	1. Ka whakapuaki i te reo Māori ake nei hei whakaahua pikitia ā-kupu.	<ul style="list-style-type: none"> <li>• Ka whakamahi i ngā rautaki kōrero, pēnei i te rere o te kōrero, i te hau o te reo, i te kaha (kore kaha rānei), i te reo ā-tinana hoki hei 'waituhi' i ngā āhuatanga o te kaupapa kōrero.</li> <li>• Ka whakamahi i ngā rautaki reo, pēnei i te kupu whakarite, te kīwaha, te whakataukī, te whakatangatanga, me te kīanga whakarite.</li> <li>• Ka whakamahi i ngā momo kupu āhua e hāngai ana ki te kaupapa, ki te pūtake me te hunga whakarongo.</li> <li>• Ka whakaahua i ngā taipitopito hei āta hanga i te pikitia ā-kupu.</li> </ul>	1.2 Te whakapuaki whakaaro hei kōrero auaha
	2. Ka whakapuaki whakaaro mō ngā kaupapa, mō ngā ariā matua hoki o aua kaupapa kia pai ai te whakatakoto tohetohenga, taunakitanga rānei hei whakaū i te whakaaro.	<ul style="list-style-type: none"> <li>• He pai tana whakaraupapa whakaaro – e hono ana, e tautoko ana tētahi i tētahi.</li> <li>• Kua mōhio ia ki tana kaupapa.</li> <li>• He huarahi tāna hei whakatakoto i ōna whakaaro kia mārama tonu ki te hunga whakarongo.</li> <li>• He māmā te whai i ōna whakaaro.</li> <li>• Ka whakamahi i te reo whakapakepake.</li> <li>• Ka whakamahi i ngā rautaki reo, pēnei i te rere o te kōrero, i te kaha (te kore kaha rānei), i te reo ā-tinana hoki hei whakarākai i ōna whakaaro.</li> </ul>	1.1 Te whakapuaki whakaaro hei kōrero whakamōhio  1.5 Te whakatau kaupapa hei kōrero  1.11 Te whakaatu i ngā putanga rangahau

A-Tā	<p>1. Ka whakaaro nuitia ngā pūkenga ka whakamahia e te kaituhi, e te kaitā e rangona ai tōna ake wairua tuhi, wairua tā rānei.</p>	<ul style="list-style-type: none"> <li>• Kua mōhio ia ka pēhea te whakataurite i ētahi kōrero, mōhiohio, āhuatanga rānei ki ētahi kōrero anō, aha atu, aha atu. Kua mōhio hoki ia me pēhea te arohaehae.</li> <li>• Kua mōhio ia ki ētahi mahi ake a te kaituhi, te kaitā. Kua mōhio ia ki ētahi āhuatanga e hāngai pū ana ki te kaituhi, ki te kaitā.</li> </ul>	<p>1.3 Te whakapuaki whakaaro hei tuhinga whakamōhio</p> <p>1.4 Te whakapuaki whakaaro hei tuhinga auaha</p> <p>1.8 Te tātaritari i te reo tuhituhi hōu</p> <p>1.9 Te tātari i te reo tuhituhi tawhito</p> <p>1.12 Te urupare atu ki ngā tuhinga reo Māori.</p>
A-Tinana	<p>1. Ka mārama ki te reo ā-tinana i ngā horopaki huhua ahakoa ōpaki, ōkawa rānei.</p> <p>2. Ka whakamahi i ngā āhuatanga katoa o te reo me te tinana hei whakatau tika i ngā take, hei whakawhitiwhiti whakaaro, kare ā-roto me te mōhiohio.</p>	<ul style="list-style-type: none"> <li>• Ka tautohu, ka hono, ka whakamārama he aha i pērā ai te reo ā-tinana o ētahi tāngata i roto i ētahi horopaki.</li> <li>• He hāngai tana whakamahi i ētahi tikanga pāpori i roto i ngā horopaki maha.</li> <li>• Kua mōhio i ētahi wā he kaikōrero ia, i ētahi wā he kaiwhakarongo.</li> <li>• He hāngai tana whakamahi i te reo ā-tinana hei tuku whakaaro, kare ā-roto, mōhiohio rānei.</li> </ul>	<p>1.7 Te tātaritari i te reo kōrero</p> <p>1.2 Te whakapuaki whakaaro hei kōrero auaha</p>

**Taumata 6 –**

**Puna Reo: Ka tipu haere tonu te puna kupu me ōna āhuatanga katoa.**

	<b>Whāinga Paetae</b>	<b>Putanga Ako</b>	<b>Paerewa Paetae</b>
<b>Ā-Waha</b>	3. Ka whānui tonu ngā kupu me ngā momo rerenga e tika ana mō ētahi momo kōrero, pēnei i te matapaki, i te tuku pūrongo, i te taupatupatu, arā atu, arā atu.	<ul style="list-style-type: none"> <li>• Kua mōhio ia me pēhea te whakatakoto whakaaro ina kore ia e whakaae ki te whakaaro o ētahi atu.</li> <li>• Ka tika tana whakamahi i te reo me ērā atu āhuatanga e hāngai ana hei whakaatu kua rongu ia i ngā whakaaro o ētahi atu.</li> <li>• Ka mārama ko te whāinga o te pūrongo, he whakamārama i tētahi hanga (hei tauira: pēhea te rere a te manu tukutuku).</li> <li>• Ka mārama ki te tikanga o te kupu wetereo nei, te 'tangata tuatoru', ka tika anō te whakamahi i ngā horopaki e hāngai ana.</li> <li>• Ka hāngai te reo ki te horopaki, ki te kaupapa me te hunga whakarongo.</li> <li>• Ka mōhio ki te pūtake o te pūrongo.</li> </ul>	<p>1.1 Te whakapuaki whakaaro hei kōrero whakamōhio</p> <p>1.2 Te whakapuaki whakaaro hei kōrero auaha</p>
	4. Ka hāngai te whakatakoto kupu ki ngā ture o te reo.		1.5 Te whakatau kaupapa hei kōrero
<b>Ā-Tā</b>	2. Ka whānui te puna kupu e taea ai te tautoko, te whakawhitiwhiti māramatanga, te whakakotahi hei whakatau, hei whakaiti rānei.	<ul style="list-style-type: none"> <li>• Ka hāngai tana whakamahi i ngā kupu, kīanga me ngā rerenga kōrero ki te pūtake o tana kōrero ā-waha, ā-tuhi, ā-tā rānei.</li> <li>• Ka honohono haere i ōna whakaaro kia māmā ai te whai i te ia o tana kōrero. Kua mōhio ia he pai ake te whakamahi i te rerenga poto i ētahi wā hei whakamārama.</li> </ul>	<p>1.4 Te whakapuaki whakaaro hei tuhinga auaha</p> <p>1.11 Te whakaatu i ngā putanga rangahau</p>

Taumata 6 –

Rautaki Reo: Ka whakamahi rautaki reo, ā, ka taea te whakamārama ngā huarahi kua whāia hei whakatutuki i tāna i whakaputa ai, i rongo ai.

	Whāinga Paetae	Putanga Ako	Paerewa Paetae
ā-Waha	5. Ka arohaehae i ngā kōrero me ngā tuhinga Māori ake i runga i te hāngai ki te kaupapa, ki te momo reo me te kaipānui, kaiwhakarongo rānei.	<ul style="list-style-type: none"> <li>Kua mōhio ia me pēhea te whakataurite kōrero (ā-waha, ā-tuhi, ā-tā), mōhiohio, āhuatanga rānei. Kua mōhio hoki ia me pēhea te arohaehae.</li> </ul>	<p>1.7 Te tātaritari i te reo kōrero</p> <p>1.8 Te tātaritari i te reo tuhituhi hōu</p> <p>1.9 Te tātari i te reo tuhituhi tawhito</p>
	6. Ka tika te whakarāpopoto i ngā ariā matua o te kōrero ā-waha, ā-tuhi, ā-tā rānei.	<ul style="list-style-type: none"> <li>Ka pai tana whai i te ia o te kōrero.</li> <li>Kua mōhio ia ki te rerekētanga o te ariā matua me ngā kōrero tautoko.</li> <li>Kāore e kuhu atu i ngā kupu, i ngā kōrero kāore e āta hiahiatia ana.</li> <li>Ka kaha ia ki te aro ki te pūtake o tēnei mea te whakarāpopoto, arā, ki te tautohu i ngā ariā matua me te whakamārama i aua ariā matua mā te kaipānui, kaiwhakarongo rānei.</li> </ul>	<p>1.5 Te whakatau kaupapa hei kōrero</p>

ā-Ta	<p>3. Ka whakahiato, ka āta arohaehae i ngā kohinga hei rautaki whakaoti rangahau.</p>	<ul style="list-style-type: none"> <li>• Ka tīpako haere ia i ngā kōrero e hāngai ana ki tana kaupapa mai i ngā puna mōhio huhua, arā, i te ipurangi, i te pukapuka, i te puna reo ā-waha, i hea rānei.</li> <li>• Ka whakamahi i ngā rautaki mātai hei tautohu i ngā kōrero e hiahiatia ana. Hei tauira: Ka mātai i te kōrero ki te kimi i ngā kupu matua, kīanga matua rānei e hāngai ana ki tāna e hiahia ana. Tērā pea, he taitara, he rerenga kōpaki i te kaupapa, he kupu kīnaki i te whakaahua, he pikitia.</li> <li>• Ka whakamahi i ngā wāhanga matua o te pukapuka, o te whārangi 'kāinga' rānei o te ipurangi kia māmā ai, kia tere ai tana kimi mōhiohio (hei tauira: ka mātai i te ihirangi, i te rārangi pukapuka).</li> </ul>	<p>1.10 Te whakamahi rautaki rangahau.</p> <p>1.11 Te whakaatu i ngā putanga rangahau</p>
	<p>4. Ka arohaehae i ngā rautaki pānui e hāngai ana ki ngā take whānui.</p>	<ul style="list-style-type: none"> <li>• Ākina te ākonga kia arohaea te hāngaitanga o ētahi o ngā rautaki pānui ki tētahi take.</li> <li>• Koia ēnei ko ētahi o ngā rautaki pānui ka arohaea mō te hāngaitanga: <ul style="list-style-type: none"> <li>- ngā wheako me ngā mōhiohio o mua</li> <li>- te whakatakoto whakapae</li> <li>- te patapātai</li> <li>- te hanga whakaahua ki te hinengaro</li> <li>- te kohika i te tikanga o te kōrero</li> <li>- te tautohu i te whāinga me te titiro a te kaituhi</li> <li>- te tautohu i te whakaaro matua</li> <li>- te whakarāpopoto mōhiohio</li> <li>- te tātari me te kōtuitui whakaaro</li> <li>- te arotake whakaaro, mōhiohio.</li> </ul> </li> <li>• Ākina te ākonga kia whakamārama i te tuhinga, me ngā āhuetanga o te pānui e mārama ai te tuhinga ki a ia.</li> <li>• Ka whai whakaaro ki ngā ia me ngā whakaaro o te porihanga hei rautaki pānui kia mārama ai te tuhinga ki a ia.</li> </ul>	<p>1.10 Te whakamahi rautaki rangahau</p> <p>1.12 Te urupare atu ki ngā tuhinga reo Māori.</p>

		<ul style="list-style-type: none"> <li>• Ka tautohu i ngā waiaro o te pāpori i te wā i tuhia ai te tuhinga.</li> </ul>	
	5. Ka whakahāngai i ngā āhuatanga o te whakatakoto kōrero hei whakaihi i te kaipānui kia aro mai ki tā te kaituhi e hiahia ai.	<ul style="list-style-type: none"> <li>• Ka whakamārama i tāna titiro, me ngā take i whakaaro pērā ai ia.</li> <li>• Ka pūmau ia ki tāna titiro tae noa ki te mutunga.</li> <li>• Ka whakaraupapa i ngā take kia māmā ai te whai i te ia o ōna whakaaro.</li> <li>• Ka tīpako haere i ngā kupu whaihua e hāngai ana ki tana kaupapa.</li> </ul>	1.4 Te whakapuaki whakaaro hei tuhinga auaha 1.6 Te whakatau kaupapa hei tuhinga
	6. Ka āta whakamahi i ngā āhuatanga maha o ngā momo reo tuhi maha hei whakaniko i ngā tuhinga whānui.	<ul style="list-style-type: none"> <li>• Ko ngā momo āhuatanga ko: te reo whakarite, te waituhi whakaahua, te whakatangatanga, te noho raupapa o ngā whakaaro, ngā momo kupu, te āhua tonu o te whakatakoto kōrero me te hāngai o te reo, te tuhi whakaahua.</li> </ul>	1.3 Te whakapuaki whakaaro hei tuhinga whakamōhio.
ā-Tinana	3. Ka hāngai te reo ā-waha me te reo ā-tinana ki te kaupapa.	<ul style="list-style-type: none"> <li>• He māmā te kite atu i te hononga o te reo ā-tinana ki te reo ā-waha.</li> <li>• He pai tā te ākongā whakamahi i te reo ā-tinana hei tautoko, hei whakarākai i tana kōrero.</li> </ul>	1.1 Te whakapuaki whakaaro hei kōrero whakamōhio

## TE MAHERE WHAKAAKO I TE REO MĀORI

Ka tae atu te ākonga ki te Taumata 6 o te marautanga, kua matatau kē ia ki te tino nuinga o ngā ture me ngā whakatakotoranga o te reo o ia rā. Heoi, kei te pakari haere tonu te puna kupu me te āhei o te ākonga ki te whakamahi i te reo kia whaihua, kia whaitake, kia hāngai. I tēnei taumata, kāore tonu te ākonga e mōhio ki ngā whakamahinga katoa o te reo, ki ngā rautaki rānei e māheheha ai te tikanga o te kōrero.

Kia haere tonu te ako, ka whakamahinetia ai ngā pūkenga reo me ngā rautaki reo o te ākonga, kia hāngai, kia whaihua, kia whaitake āna kōrero. I roto i ēnei mahi ka kitea te tohungatanga o te ākonga ki te whakanikoniko me te tārai i āna kōrero ki ngā nuka o te reo.

I ngā pūkenga reo e whanake haere ana i tēnei taumata, ka pakari ake ngā rautaki ako me ngā rautaki whakaaro o te ākonga, kia kaha ake ai tana whai wāhi atu ki te ao o te reo matatini Māori me te ao mātauranga.

E eke ai te ākonga ki ngā taumata o te ako i ērā atu wāhanga ako o te marautanga, me āta whakaako ngā rautaki whakawhitiwhiti, kia kite ai te ākonga i ngā hononga i waenga i ngā kaupapa ako katoa. Hei tauira, ki te whakaakona te reo o te pāngarau i te wā e whakaako ana i ngā rautaki pāngarau, ka māmā ake te ako. Ki te tuhonohono te kaiako i ngā horopaki ako, ka māmā ake anō te ako. Hei tauira, ko te whakapae tētahi rautaki e whakaakona ana i ngā wāhanga ako katoa. Nō reira, ākina te ākonga kia āta whakawhitia tāna e mōhio nei mō te whakapae i roto i ngā akoranga Pūtaiao, ki ngā akoranga reo. Ko te tukanga rangahau, ko te tuhi pūrongo, ko te whakatau kaupapa anō ērā e whakaakona ana i ngā wāhanga ako katoa.

Koinei ētahi o ngā huatau matua e tika ana kia ārahi i te whakatakoto mahere mō te whakaako i te reo Māori.

Tirohia a *Hei Korowai Tuatahi mō te Marautanga Reo Māori: Te whakamahi i te marau reo Māori*. Kei reira te roanga o ngā kōrero mō ngā horopaki ako me ngā kawenga hei ārahi i ngā ākonga ki te:

- tūhura i ngā momo reo tuhi
- tūhura i te whakatakoto o te tuhinga
- tūhura i ngā pū, i ngā oro, i ngā kupu me te ahunga o te tuhinga
- tuhi tauira o tētahi tuhinga me te whakatikatika haere
- tūhura i te kupu me te hanga kōrero
- whakaputa reo ā-waha
- kimi kōrero me te rangahau kaupapa
- tūhura i ngā whakaaro me te tikanga o te tuhinga
- whakamahi tahi i ngā rautaki pānui.